



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

**US Open: Kidambi
Srikanth final-i iogo**

**Venezuela menoknok lendong
nung asür 1,400 jungogo**



VOL. XXIII ISSUE NO. 256 (ADOK 256) DIMAPUR TENTONÜ (MONDAY) AAMI (JUNE) 29, 2026

₹ 5.00

Naga Students' Federation-i Kuki-Zo Council aitsür

Dimapur, June 28, 2026 (TYO): Kuki-Zo Council (KZC)-i tawa sangdong ka agütsüba nung Naga civilian trok pur aoba, reshikangshiba aser tepsetba paitoktsü merangba lir ta Naga Students' Federation (NSF)-i Deobarnü ashi.

KZC-isa "Kacha Naga" olung amshiba ya magizüker aser iba ya telemsa adokdaksütsü aser mezügmeshiba mapa ka lir ta NSF-isa metetdaksüogo.

Kuki-Zo nunger atema noktakba telok kati lisopur Naga nunger maitsü lemsatsüba mesüra tenüng tasen agütsüba ya magizüker ta parnokisa ashi.

"Kacha Naga" ta parnok i amshiba ya kanga tim masü. British nunger yimsüsüba mapang Naga nunger litsü nung arua alirtemi lisopur Naga nunger maitsü tasen agütsütsü meranger ta NSF-isa metetdaksü.

"Ajak dang tongtipangbaji Naga

civilian trok tepsetba lir aser koma'ar ka kümdanga aser shisakaa zülüaka ibaji temeten anguba masü. Sasaa bilemba agi nisung pur aoba, reshikangshiba, tepsetba aser tasümgang sensamasa amshiba maidoktettsü" ta NSF-isa metetdaksüogo.

Naga civilians trok pur aoba aser tepseter ajak pua arutsüla. Kuki telungpur teloktem nungi züngsemtem mesüra civilian kari dang iba nung shilem agia lira, parnok maitsü jangjatsüla, aputsüla, ken o benoka angadangsüla aser ozüngi melaba ama merenshitsüla ta NSF-isa takhangba nenshiogo.

Centre sorkari Kuki telungpur teloktem den Suspension of Operations (SoO) agientsüla kechiyong iba tenangzüktep kübok aliba teloktemi tashiyim mapa inyakogo aser human rights alema inyaksangshiogo ta NSF-isa akhangar.

Nagaland nung scholarship applications lapoktsür

Dimapur, June 28, 2026 (Agencies): 2026-27 academic session atema Centrally Sponsored Post Matric Scholarship (PMS-ST) aser State Merit & Research Scholarship atema July 1 nungi online applications agizüksü ta Nagaland Higher Education Department-i metetdaksüogo.

September 30, 2026 tashi fresh aser renewal applications agütsütsü akok ta department-isa ashi.

Post Matric Scholarship for Scheduled Tribe students (PMS-ST) ya National Scholarship Portal ajanga angutsü aser iba ya ST kaketshirtem yaritsü atema lir. Iba ajanga ST kaketshirtem Class XI nungi shir college aser university education nung teyari

angutsü.

State Merit & Research Scholarship ya Nagaland Common Scholarship Portal ajanga agütsür aser iba ajanga nüngdakba academic aser income criteria atongerba meritorious students aser research scholars-i teyari angutsü.

July 1 nungi September 30 tashi application window lapoktsü aser iba sülen October 31 tashi nung institutional verification asütsü ta department-isa metetdaksüogo.

Kaketshirtemi November 15 tashi defective applications melenshitsü akok aser November 30 tashi nung final state-level verification tembangtsü ta department-isa ashi.

India-i 'Operation Amistad' kübok Venezuela yarir

New Delhi, June 28, 2026 (Agencies): Indian Air Force C-17 Globemaster III tayimtsü anati ghonda 23 tashi orr menoknok agi kongshiba Venezuela nung teyari agütsüogo.

'Operation Amistad' kübok tayimtsü ana nung relief material 66 tonnes jungnua bener kilometer 14,000 tashi orr Maiquetga International Airport, Caracas nung anenzüka liasü.

Iba nung Indian Army Field Hospital contingent ka dena lir aser khu abenba rongnung relief supplies & medicines 35 tonnes tema den BHISHM Cubes ana densema liasü.

Côte d'Ivoire nung aliba Embassy of India ajanga C-17 tayimtsün ana ya Abidjan adena Venezuela-i aru.

Iba contingent nung medical

officers 9 dena personnel 41 dena lir aser parnok i emergency medical care, trauma management, life-saving surgical support, aser tanga essential healthcare services agütsütsü.

Tayimtsü ana nungsa Ministry of External Affairs ajanga agütsüba medical stores aser humanitarian relief supplies 6 tonnes shi bena liasü.

India nung Aarogya Maitri Project kübok BHISHM Cube ka bener ao aser iba yagi shir anger 200 tashi yaritetba functional field hospital ka yangluteter.

Venezuela anüdoklentip tsütsü menoknok ana- 7.2 aser 7.5 magnitude nung anak aser item lendong nung nisung 1,430 shi taküm samaogo, 3,238 yirua lir aser kibong 3,142 talidak maka kümdaksüogo.

Nagaland nung Polio National Immunization Day tenzüko



Kohima, June 28, 2026 (TYO): Nagaland nung tanü state-level Polio National Immunization Day (NID) 2026 tenzüko aser iba mapang Health & Family Welfare Department-i tanur 1,43,530 nem polio mozü jemdaksütsü nükjidong lir.

India-i 'polio-free status' nguteta aliba mesamadaksütsü atema Nagaland nung arishi küm 5 ser teküpok tanur ajak nem polio mozü jemdaksütsü.

Deobarnü Seikhazou Urban Primary Health Centre (UPHC), Kohima nung state-level programme tenzüker aser State Immunization Officer, Dr. Imkongtemsu Longchar-i mezügbuba Oral Polio Vaccine (OPV) drops jemdaksü.

"2014 nungi India ya polio-free süa arur aser linük nung polio tatemsaba putetbaji 2011 nung liasü. Lanur doctor aikati polio agi shiranger ka dang majurudang lir aser iba ya immunization maparen kanga meranga inyakba

ajanga lir" ta Dr. Imkongtemsu-i ashi.

Ajisüaka Afghanistan aser Pakistan nung wild poliovirus type 1 kanga bulua prokshir aser nisung temeyoktep aliba tesemtem nung vaccine-derived poliovirus strains bushitetogo anungji immunization coverage ajema kümra polio menatsü ana nung dang lir ta pai ashi.

Polio tashidak ajanga taküm piyong paralysis kümdaksütsü akok aser iba ajanga kibongtem nem timtem onsara agütsür anungji tsüraburtemi anti-vaccination olulutem dak mamangtsüla ta Dr. Imkongtemsu-isa ayongzüker.

Oral polio vaccine nung lendong kecha mali, angati agütsür aser iba mozü ajanga mapa inyaker. Mapang shitak nung immunization asüba ajanga tanurtem aika tashidak balala nungi kümzüka ayur ta paisa shisem.

Sorkari kanga meranga vaccination maparen inyaka

aruba ajanga taküm küm measles samatsütsü ta paisa ashi.

Polio Immunization campaign kübok Nagaland tesem balala nung polio booths 2,400 tema lapok aser iba nung booth centres 157 aser Kohima district nung mobile teams 12 dena lir.

Deobar anepdang 8:00 ako nungi nikongdang 3:00 ako tashi vaccination booths lapoka liasü. Iba sülen health workers-i Hombar nungi house-to-house campaign tenzüksü.

Department-isa civil society organisations, faith-based groups, village councils, Lions Clubs, Rotary International, Indian Medical Association (IMA), Indian Academy of Pediatrics (IAP) aser public dang iba campaign nung yariteptsü mepishia metetdaksüogo.

Iba sentong nung District Immunization Officer Dr. Khrievilhou Nakhro menden liasü aser Medical Officer, UPHC Seikhazou, Dr. Bilva Yalie-i temoatsü meshia sarasadem.

United Naga Council-i PM Modi dang teyari meshir

New Delhi, June 28, 2026 (Agencies): Manipur nung Naga kin 21 atema tematiba telok United Naga Council (UNC)-i Prime Minister Narendra Modi aser Centre sorkar dang Manipur tensa atema tebang aitsü, Naga nunger aliba tesemtem nung security akangshitsü aser Naga civilian 6 pur oa tepsetba atema temeten agütsütsü mepishiogo.

New Delhi nung Press Club of India nung osangbener den jembidang UNC-i Prime Minister nem memorandum ka agütsüba osang lemsatep. Iba osangbener senden ya Delhi Solidarity Group teyari ajanga agi aser UNC den külemi Naga Women's Union aser All Naga Students' Association, Manipur PM Modi dangi shidi züluba ashi.

UNC-i New Delhi nung political leaders, civil society organisations, women's groups aser peace activists den ajurutepa Naga nunger tebilemstü lemsateptsü atema aru ta lennirtemi ashi.

Manipur nungi Naga nunger taintemi tang mezümgang atema national media den ajurutepa

jembir. Tawa Manipur nung ozümgang alema inyaksangshi manenba ajanga Naga nunger aser onok ali nung kongshir ta UNC-isa metetdaksü.

"Onoki Prime Minister dang indangindanga mepishir. Framework Agreement akhümtsübuang, Naga tesemtem kümzüka yuang aser prangpong amer Naga civilians anema inyakba ya local disturbance ama dang mezümgangshitsüla. Iba ajanga India-i yimjung maparen inyakba aser eastern frontier nung security dak kongshir" ta UNC-isa ashi.

Naga civilian trok pur aoba aser tepsetba atema mapang züngzüker bushisümgang asütsüla ta parnokisa takhangba agütsü.

Manipur nung ozümgang alema inyaksangshiba ya law-and-order tebilemstü ka ama dang mezümgangshitsüla. Tawa Ukhrul aser Kamjong district tem nung Naga yimtsümgang amakba nung cross-border armed elements, military-grade weapons, drones aser rocket launchers amshia liasü ta UNC-isa ashi.

Naga civilian 6 pur aoba aser

tepseter aser ano Wilson Thanga Chiru tepseter ajak aputsüla aser ozümgang kübok ken o benoka angadangsüla ta parnokisa ashi.

Iba tatalokba nung Leilon Vaiphei village chief aser Manipur Police personnel kar densema liasü anungji parnok dak-a ozümgang melaba ama inyaksüla ta UNC-isa takhangba agütsüogo.

Kuki National Front-President (KNF-P) ya terrorist organization ama sangdongtsüla aser Kuki telungpur teloktem den Suspension of Operations (SoO) agreement agientsüla ta parnokisa akhang.

UNC-isa Manipur Deputy Chief Minister Nemcha Kipgen mapa nungi anentsütsü takhangba agütsüogo.

August 3, 2015 nü Indo-Naga Framework Agreement mapa küma inyaksüla, Naga nunger aliba tesemtem nungi ozümgang memelaba armed cadres agientsüla, National Highways lapoktsüla, taküm February ita nungi amakbatem asoshi judicial inquiry ka tenzüksüla aser tekarakba nung Indo-Naga yimten latettsüla ta UNC-isa takhangba nenshiogo.

Lions Club of Kohima nung board of directors tasen shimogo



Honibarnü tangokba noksa nung Neena Dutta den Lions Club of Kohima nung board of directors tasentem angur.

Dimapur, Aami/June 28 (TYO): Lionistic Year 2026-27 atema Lions Club of Kohima nung board of directors aniokba sentong ka Honibarnü agia liasü.

Board of directors ya club indang tir inyaksü shima alisang Talitemsu Jamir, secretary inyaksü shima alisang Max Marius Menuse-o, kimen inyaksü shima alisang Kaikho Dawman, first vice president shima alisang Ketoukholie Whuorie aser second vice president Akhrienuo Kire nungertem alitsü, aser Lion Dr. Neena Dutta, District Governor (Elect), District 322D ajanga parnok azüngashiba agia liasü.

Dr. Neena Dutta-i iba omen "Be the Crown of Service" aser

mangdang "More Service More Quality Members" nung ajemdaker tayongzükba o jembia liasü.

Lai jembidang, korang ya konang, teinyaksü aser lenir temaitsü alima ajunga nung amshiba lir, ta ashi.

"Lions Club nung asenok asoshi konang tulutibaji tashi mesüra jenjang masü, saka nübur tenzükba ya lir. Chichiba korang ya hon agi yangluba masü saka meimchir asoshi yangluba lir ta teti bilemtsüla," ta Dr. Dutta-i ashi.

District Pin aser DG Medal inokba ajanga tenzükba ya asenok asoshi takok tulutiba aser Lion ajunga sentsü prangshiba korang sütettsü ta ashir, ta lai ashi.

Nübur tenzükba ya chichiba lenirji lir. 'Be the Crown of Service' tetetzü temeim, aria bilemba aser pei asoshi mebilemba ya konang tulutiba alitsü, ta ashi.

Lions Club of Kohima nung ponguben tir inyaksang Oken Jeet Sandham-i pa tajangshiba tem lemsatapa liasü aser DGE tenüngtem zünga shia tir tasenba Talimeren Jamir nem mapa amokja liasü.

Talimeren Jamir-i tir o jembia liasü. Iba sentong nung S.P. Francis menden liasü aser Rheituohunuo Whuorie-i anir flag salute agia liasü. Iba sülen senden tenzükba sarasadem aser secretary report agüja liasü. Sentong tembanga Dr. B. Imli Wapang-i melepzüng o jembi.

Northeast NSS Festival nung Nagaland-i sobaliba tsüngsang akok

Dimapur, Aami/June 28 (TYO): Arunodaya University, Arunachal Pradesh nung Northeast NSS Festival nung sobaliba tsüngsang tetoktepba nung Nagaland nungi züngsem 33 National Service Scheme (NSS) ajanga mezüngbuba jenjang ngua liasü.

Anogo pongu benjong ya June 24 nungi 28, 2026 tashi agia liasü, kong northeastern states ajunga nungi NSS volunteers temi shilem agi.

Nagaland tenüng nung MGM College, Dimapur nungi NSS volunteers 32 den programme officer Sentikala

dena liasü. Parnoki iba sentong nung Nagaland indang sobaliba senmang tajungtem sayua liasü.

Iba den külemi parnoki quiz competition, PowerPoint presentation aser jepdak jembi amala tetoktepba nung shilem agia parnok sempet sayua liasü.

AR-i Garrison Hospital Kohima nung polio agütsü

Kohima, Aami/June 28 (TYO): Assam Rifles temi Garrison Hospital, Kohima nung June 28, 2026 nü Pulse Polio Immunization Drive ayongzükba liasü.

Iba sentong ya arishi küm pongu tekübok tanur nem Oral Polio Vaccine (OPV) agütsütsü nükjidong nung ayongzükba linük nung polio tashidak samadaksütsü merangba nung shilem agia liasü.

Garrison Hospital nungi medical team ajanga iba immunization drive agia tanur 41 nem polio mozü jemdaksü.

Iba mapang medical



personnel temi tsürabor tem dang immunization shidak agüja tanurtem mapang shia temang reprangdaksütsü ayongzükba liasü.

State level Palliative Care Training sentong tembangogo



Dimapur, Aami/June 28 (TYO): National Programme for Palliative Care (NPCC), Directorate of Health & Family Welfare Kohima, Nagaland ajanga nurses aser Psychiatrist tem asoshi ayongzükba State level Palliative Care Training sentong takok ngua tembangogo, koba June 25-27, 2026 anogotem agia liasü.

Iba training tembangba sentong nung Dr. Imnapokim Joint Director & SPO for Palliative Care Programme menden liasü.

Training agütsür temi iba training nung shilem tajung agiba atema pelaba lemsatap, shirnoki iba training nung angazükba

shisatsü pei health facilities nung amshia Palliative care services tajungba kumdaksütsü nangzüktepa liasü.

Training nung shilem agirtem nema kulizüng kakat agüja liasü. Technical sessions nung training ya Hanife Macgamwell, Honorary Head & Instructor for ELNEC USA in India; Nileema Sharad Shingade, Senior Nursing Officer, AIIMS New Delhi; Ramswaroop, Senior Nursing Officer, AIIMS Jodhpur; Arvind Sharma, Senior Nursing Officer, AIIMS Jodhpur aser Sudip Rudra Paul, Nursing Officer, Dr. B. Borooah Cancer Institute nung temi agüja liasü.

State tesem balala nung National Immunization Day 2026 mungogo



Mokokchung

Peren

Dimapur

Dimapur, Aami/June 28 (TYO): Linük ajunga den külemi Dimapur24x7 Foundation ajanga District Hospital Dimapur den lungjemer Deobarnü National Immunization Day 2026 (National Pulse Polio Day) munga Dimapur tesem balala nung arishi küm 0-5 tsüngta tanurtem nem polio drops agüja liasü.

Iba immunization drive ya Dimapur24x7 mendenpula Annie Jain lenisüba kübok New Market aser Erore Lane Assam Bus Stand nung agia volunteers aser healthcare personnel tem yaritepa tanur nem polio vaccine ya agüja

liasü.

Iba sentong nung nübur aikati shilem agia liasü aser tsürabor kari pei tanur nem polio agütsütsü nungnanga aliba ketdangsür temi kanga junga rateta ashi.

Mokokchung nung National Immunization Day/Pulse polio sentong ya Deobarnü Imlong Place, Mokokchung nung agia liasü.

District nung National Immunization Day tenzükja Dr Tiasunep CMO, Dr Limanaro DPO (UIP&RCH) aser staff tem lia 2026 asoshi mezüngbuba Polio Drop ya Dr Madhavi R IAS, Assistant Commissioner

ajanga agüja liasü.

Iba sentong tenzükdang Dr Tiasunep CMO, Mokokchung ajanga health workers tem dang India polio tashidak maliba linük kumdaksütsü asoshi maneni külemi inyaksü ayongzükba liasü.

Iba asoshi pai volunteers aser health workers tem dang District nung arishi küm 5 tekübok tanur kata mepaidoki polio drop agütsütsü ayongzük.

Pai ano District administration, DPRO, Indian Red Cross Society, Rotary Club Mokokchung, Village aser Ward Councils, NGOs aser Allied Departments dang parnoki

maneni yariba asoshi pelaba lemsatapa liasü.

Iba sentong nung Dr Limanaro DPO (UIP&RCH) menden liasü aser Narosenla, CED MTBA ajanga sarasadem.

Mokokchung nung NID House to House mop up session ya June 29 & 30, 2026 anogotem agütsü.

Linük ajunga den külemi District Hospital Peren nunga June 28, 2026 nü National Immunization Day tenzükba sentong agia liasü.

Vekhohu Puro, NCS, EAC, New Peren ajanga sentong tenzükja mezüngbuba Polio drop agüja liasü. Iba tenzükba sentong

nung Zhochilu Venue, BPM menden liasü aser Dr. Velentina Neikha, DPO (RCH & UIP) Peren ajanga iba anogomung ratet ashi.

Vekhohu Puro, EAC-i vaccine agütsütsü kota tongtipang ta asüba onük nungi jembi aser takum anema alitsü asoshi pei dak nungi tenzüktsüla ta ashi.

Pai tsürabor aser health workers tem dang ambassador ama Medical department inyakyim balala indang awareness agütsütsü ajungmesoa liasü.

Neingutuonuo, Nursing Sister ajanga Tsüngrem temoatsü meshia sarasadem.

Arishir Nüngsang



"Nenoki Kibuba sangang. Kü mulungjang ajak agi ni Kibuba nem tenüngsang agütsütsü; ochishir mungdang nung, aser tamanger telok sentep nung."
Tenüngsang Ken 111:1

- Kü Temulungjang ajak agi Yihova Tsüngrem tenüng asanger. Tulusang Tsüngremi ni küm 90 tashi arishi moatsüba; senti temoatsü, akhüm taket tebor junga lidaktsüba kuli tatsüka lemsateper.
- o Tsüngrem temeim-i ni kodanga metoktsü.
 - o Pai ni teti awabanga kümzüka ayur.
 - o Pa taochi aser tashi agi nianüker.
 - o Tanü tashi tenük telen shitak yutsü nung Pa külemi deobar anogo sentep-i aor.
 - o Kinungbo-i alima nungi pilar küm 44 tashi lia arudang, Pai ni kenüdanga rongjena metoktsü. Tsüngremji kü jinokdak aser kü tashi. Pa nüng teti ni ulutsür/ ulutsütsü.

29 June, 2026 anogo nung ni küm 90 abensaba anogomong nung kü jabaso jalatem, semchirtem, ponertem, kinünger, medemer aser kiyongertem ajaki senpet

tajung jenti den sarasadem ajanga kü den temiem lemsatepa ni peladaktsür. Shimoki mapang ajak nung sarasadem, nübu rongsen aser temeim agi anepalua arur, nenok dang kanga pelar aser ni nenok ajak asoshi Tsüngrem nungi taochi aser temoatsü meshia sarasademtsür. Tsüngremi ni ama ka dang meim nung nenokbo ano tali moajangma ta kü sarasadem nenok den teti alitsü.

Arungma ase ok longjemer Tsüngremer mezüngdangtetba temoatsütem asoshi tenüngsang ola Pa narong tongdaktsüdi. Maneni anema lia tepela yimchung teperi taküm, Pa taochi nung arishia alitsü asoshi Pa pelatsüsa litetba taküm ka ka alitsü ayongzüker.

Tsüngremi asenok ajak moajangma.
"Kibubai onok asoshi mapa tulu inyak; aser onok pela-a lir." Tenüngsang Ken 126:3

Küm 90 Arishir,
Toshimenla Jamir
Windy Ward, Changtongya Town

Maharashtra nung MAHA TET 2026 Question Paper Leak asü

New Delhi, Aami/June 28 (Agencies): Maharashtra Teachers Eligibility Test (MAHA TET) 2026 question paper leak asüba sülen state sorkari iba exam thinenogo.

Iba examination ya June 28 nü state tesem balala nung exam centres 1,028 nung agitsü liasü, ajisüaka exam agitsü jelia police-i questions paper kar anguba sülen iba tatidang thinenogo aser iba ken o dak sendakba nung nisung asem puogo.

Osang angazükba agi, June 27 nü Bhiwandi nung nisung kar ket nung TET question paper lir ta police nem osang ka metetdakja liasü, aser iba osang nungji ajemdaker Bhiwandi Police-i mita ao aser parnoki leak asüba paper ji Maharashtra State Examination Council nung ketdangsertem nem agüja liasü.

Leak asüba question paper ji reprangshiba mapang nung shidakba question paper (TET 2026 question paper) nung aliba question aika bushitet. Iba sülen

ken o ka benokba bushisüngdang tenzükogo.

Maharashtra state examination council-i, MAHA TET question paper renemdang security dak sendakba inyakyim aika benshia liasü ta metetdaktsü, ajisüaka iba paper leak asüba jangjaba sülen parnoki tatidang thinenogo.

MAHA TET tatidang agütsütsü atema tesayurtem densema candidate lakh 4.28-i tenüng agüja lir.

Maharashtra State Examination Council-i, exam agitsü anogo tasenbaji parnok indang official website nung sangdongtsü, ta metetdaktsüogo.

Police-i maneni iba paper koma ser leak asü aser iba dak sendakba nung nisung kwi-i shilem agia aliar bushisüngdangdar.

Ano külen osangbenertem den jembidang Cockroach Janta Party tentetsang, Abhijeet Dipke-ia, tang Maharashtra TET paper leak

asüba ajanga maneni sorkari tatidang kata ketdangsüa magitetba kuli sayur, ta shia Union education minister Dharmendra Pradhan dang menden nungi anentsü takhangba agütsü.

Dipke-i, "Mezüng NEET exam aser tang Maharashtra TET exam paper leak süogo aser ibaji ajanga tatidang thinenogo. 2017 küm nungi kaketshirtem aser tesayurtemi TET tatidang nung ochimashi anema ola adoka arur, ajisüaka ketdangsertemi inyakyim melenshitsü melen lanurtem ang takoksa ngudaktsür," ta metetdaktsü.

Paisa, "Tangbo ajak ya jangjaogo; Maharashtra nung TET paper leak asüba ya ajanga state level nung süaka national level nung süaka BJP sorkari exam kata ketdangsüa magitetba kuli sayur. Parnoki yimtenren party tem nung telemsa adokdaktsütsü aser MLA tem den MP tem aputsü dang meteta lir," ta metetdaktsü.

Ram temple trust secy. Rai aser züngsem Mishra na anenogo

New Delhi, June 28 (Agencies): Ayodhya nung aliba Ram tekülem ki tenla auyaba ken o dak sendakba nung Shri Ram Janmabhoomi Teerth Kshetra Trust General Secretary, Champat Rai aser Trust züngsem, Anil Mishra nati Trust nungi anenba shidi agütsüogo.

Trust-isa, iba ken o ya jungjunga bushisüngdangtsü, ta metetdaktsü. Trust treasurer Govind Dev Giri-i, Trust nungi anenba shidi ana agütsüogo

aser taruba senden nung iba atemaji telemtetba agitsü, ta metetdaktsü.

Trust-isa, tawa iba tatalokba ajanga kanga aoksar, melung yirur aser jashir, ta metetdaktsüba den külemi tamangertem tamang tanaben koktettsü atema iba ken o ya jungjunga bushisüngdangtsü, ta metetdaktsü.

Ram tekülem ki tenla nung ochimashi adokba dak sendakba nung FIR ka benoka liasü aser Brihostibar aonung parnok

tiprongla puogo.

Ano külen tanga osang ka nung, Ram tekülem ki tenla tim mesüi amshiba ya Shri Ram Janmabhoomi Teerth Kshetra Trust-i jelia meteta liasü, ta metetdaktsü.

Osang angazükba agi Trust General Secretary Champat Rai den police-i June 5 nü Avinash Shukla'er ki mita reprangba mapang nung sen aika angü, ajisüaka Trust-i police matsüngdang ken o mebenoki liasü.

Pakistan-i kiralongrartem networks anema inyaktsüla: MEA

New Delhi, June 28 (Agencies): Tawa Pakistan kübok Karachi nung aliba Sindh Rangers amakba atema Pakistan-i India nem tai tongloktsüba dak sendakba nung Amongnü India-i, ibaji khenyongi tiyazü aser tamendakdak maka, ta metetdaktsü.

India-isa, Pakistan-i par litsü nung amenoka aliba kiralongrartem indang infrastructure raksatsütsü atema inyaktsüla, ta ashi.

Sindh Rangers amakba atema India nem tai tongloktsüba dak sendakba nung Ministry of External Affairs (MEA) otongdar, Randhir Jaiswal-i, "Tawa Karachi nung tatalokba atema kecha tajemdakdak makai India nem tai tongloktsüba osang Pakistan nunger reports ajanga metetdaktsüogo. Onoki ibaji khenyongi magizüker," ta metetdaktsü.

Jaiswal-isa, Pakistan-i tangar nem tai tongloktsüba anentsüla aser par litsü nung kiralongrartem networks anema dang inyaktsüla, ta ashi.

"Pakistan-i pei telung tebilemtsü reprangshitsüla aser

par litsü nung aliba kiralongrartem infrastructure anema inyaktsüla. Parnoki kiralongrartem dak metalokba ya linük asalentong hadir ka mekümdaktsütsüla," ta MEA otongdarisa metetdaktsü.

Honibarnü Karachi nung prangpong amer telok kati Sindh Rangers compound sashia amak, aser iba tatalokba nung paramilitary sepai pezü asü.

Pakistan ketdangsertemi ashiba agi, Honibar nikongdang telungpurtemji Sindh Rangers' Bhattai Wing headquarters-i aruba sülen gari kati tongti kikümbangji tsükpoka aita grenade bomb aika pokdakja liasü.

Iba sülen Rangers sepaitemia meyiper rara tenzü; tesülen Special Security Unit (SSU) commandos aser Anti-Terrorist Force arua parnok yarisema minute 90 shi khatepa liasü. Iba rara nung telungpur trok kaset aser ka apu; Rangers sepaitema pezü asü.

Tesülen Sindh Rangers amakba atema Jamaat-ul- teloki tenüng agiogo. Iba telok ya Tehreek-e-Taliban Pakistan (TTP) den sendaktepa lir.

Temesepba mozü anema longjemer inyaktsüla: C P Radhakrishnan

Bengaluru, June 28 (Agencies): Amongnü linük tatong tir, C P Radhakrishnan-i temesepba mozü anema longjemer inyaktsü ayongzü; talisa pai shisaliok rejutem, kibongtem, healthcare tsütsü mongintem aser ozüng benokba agency tem dang India nung temesepba mozü meshimeshia mamshitsü atema longjemer inyaktsü ayongzü.

Paisa, iba campaign ya nija nungi tenzütsüla aser shisaliok rejutem, yimtitem aser linük tesem ajaklen prokshitsüla, ta metetdaktsü.

Bengaluru nung Rajiv Gandhi University of Health Sciences 31buba Foundation Day aser Nasha Mukta Bharat Conclave nung jembidang Radhakrishnan-i, temesepba mozü achiba ajanga nisungba health raksatsüba dang masü saka shisaliok, kibong aser linük terenlok ajak kongshir, ta metetdaktsü.

Temesepba mozü anema lanurtemi anir inyaktsüla, ta pai ashi.

"Nasha Mukta Bharat nükjidong ya temesepba mozü anema dang masü saka taküm anema alitsüsa libaliroba, telemtetba tajung agiba, kibongtemi nungitba aser temelenshi adokdaktsüba lokti yangertsü atema lir," ta pai ashi.

Paisa, iba university yagi health shisaliok tsütsü tongti shilem agiogo aser healthcare tsütsü mongin aika adokdaktsüogo, ta metetdaktsü.

Paisa, iba university nungi kaketshirtem leniba nung temesepba mozü achirtem nem treatment agütsüba, awareness agütsüba aser asalentong yangluba tsütsü shilem tulu agitsü ta ni imlar, ta metetdaktsü.

Kasa sentong nung Karnataka Chief Minister D K Shivakumar-ia, state sorkari Karnataka ya temesepba mozü mamshiba state ka kümdaktsütsü atema inyaker, ta metetdaktsü.

Paisa, temesepba mozü shibelenertem nem temerenshi tulu agütsütsü, ta metetdaktsü.



June 28, 2026 nü Jantar Mantar, New Delhi nung climate activist, Sonam Wangchuk-i (ajichilen nungi tanabuba) lumia longkak ait tenzüka mapang tangokba noksa nung angur. NEEP paper leak asüba ken o nung Union Education Minister, Dharmendra Pradhan-i menden nungi anentsüla, ta parnoki takhangba agütsür.



TIR YIMYIM YIMOBILEM (EDITRIAL)

DIMAPUR MONDAY, JUNE (AAMI) 29, 2026

Kechi agi alak ?

Naga nunger yimten nüchiso asoshi tezüluba nung amshia rara tenzüker joko küm noklang jungdi asür saka Naga nunger asoshi yimten nüchiso bushir Naga nunger telok telemsa teimba-teimba akümba dak alaka, Naga yimten tebilemtsü ken o tembanga jembiba anogobo anasaia marui nübortem timtem takoksa ajuruba mapang ka nung, tang Naga nunger lanurtemi 'Fed UP Nagas' telok ka tenteter tangsa Naga yimten tebilemtsü ya tatem küma telemtetba agüjang ta India government dang akangtsü apusoba mapa yagi, atangji, Naga nunger lanurtem Naga yimten nüchiso bushiba mapa agi laktetba mulungjang temai adoka sayur asütsü. Fed Up Nagas tetezü Naga nungertem dang lanurtemi 'onokbo laktetogo' ta ayimoktsüba tejashi ola ka lir. Iba tejashiji metetdakja parnoki yakanü Chumokukedima nung aliba Agri Expo tesem nung lokti senden ka ayongzüka aliba mapang India government dang taruba ita asem tsüngda Naga yimten tebilemtsü ken o ya latetjang ta takangba tesashi ka metetdaksüogo. Atangji, India government-i Naga nunger yimten nüchiso bushir teloktem den yimjung lapoker Naga yimten ken o jembiba maparen tembangogo ta yimjak nung metetdaksüogo, ajisüaka Naga yimten tebilemtsü ken o tatembang küma renema jembiba o ji mapa küma mesayutet aser meinyakteti küm ter dak tali süir. Ibaji Naga nungertem asoshi tesüngmangtsü aser tetamatsü mapa ka lir. India den NSCN-IM teloki 2015 küm August 3 nü alimai meteta Framework Agreement ta ser Naga yimten tebilemtsü latettsü asoshi tangatettep ken o ka renemba asenok ajaki meteta lir. Atangji, mezüngbo iba terenemba ken o nungji kechi onüksa lir, aji yimjak nung memetetdaksü, anungji Naga nungertem rongnung temulung melemtet tulu liasü. Iba jagi mesayu majung akümba agi, tesülen parnoki iba terenemba ken o sayu saka terenemba nungji parnoki jembiba ajak shitak küma renembabo mereprangtet. Iba jagi mezüng yimjak nung mesayu südi ta angatetogo. Ajisüaka, parnoki mesayutet dang ashi, Naga nungertem Naga nunger telong nung lia Naga yimten nüchiso asoshi raraba timtem aser tebilemtsüji angateta dang lir, anungji India nungsa süaka Naga nunger ya kin balaka ama temzüng ozüng agi temeten agütsüra, tang atemabo aji agi teperi asütsü. Ashiko, iba tangatetba nung ano Naga nungertem atema yimten nüchiso bushir teloktem telungjem NNPGs telokibo 2017 küm India densa alitsü saka tang dang nungi jenjang takaba aser tagitsü teimba ngua alitsü asoshi India den tangatettep ken o ka renem. Iba dangji parnoki Agreed Position ta ajar. Ajisüaka, iba Agreed Position-jia kakat nung meyong nemtep dang ashi tanü tashi terenemba ken o jagi mapa mekümtet atateper. Atangji, NNPGs asoshibo ibaji tamakok aser tejak metentettsüba mapa ka kümogo, kechiyong India government den India nungsa alitsü asoshi mulungtepa ken o renemer senshiba India-i aji mapa küma meinyaker. Aji oda, India o NNPGs na tsüngdabo ken o magizüktetba kecha mali saka NSCN-IM denbo tema nung ken o ajak tembanga jembigo ta sangdongba amaji masü, anosa tangatettepi marutetba onük kar jembiba asenoki angashir, iba jagi India government-i NNPGs den ken o renema akabaji mapa küma aotsü atsüayonger südi. Atangji, ibaji shitak lir, kechiyong kasa Naga yimten tebilemtsü ken o nung telok balala den mapang balala nung ken o tembanga latetbaji metembangba den kasa asütsü. Ibaji kodang bilemdangdir, Naga yimten melatetteti tang tashi Naga nunger kangshiba ya India kisüng dang atongtsüla masü saka Naga nungertem daka tuluka keta lir. Ibaji kodang jungjunga bilemdangdir, tang Fed Up Nagas telok ama jagia koba telok agi Naga nunger telaktetba asütsü ta shisadangtsü junger. Kechi agi alak ? India-i telatetba yakta magütsüba agi asü mesüra Naga nunger yimten nüchiso bushir telok 33 tashi kümer Naga nunger asoshi yimten nüchiso bushitsüba agi alak ? Ibaji tama FUN telokia jangjamatsüla !

OLEMSABANG

Manga-i teshinem menemba tesem nung dang linur

~ L. Kika Pongener.

(Yashi adok nungi...)

Ano kanga-sa tia maka nisung karbo; yimden, arogo aser lokti ajak nung lennir shir lidir, parnok aibelenba tai dang kishia bushia, kodaser alangdaksütsü, kodaser atsüzüksü aser kodaser atsüngdoktsü...ta iba tapokji dang bushia; iba lenmangji dang bushia; iba tasaji dang asaa; aonunga ayipjanga memejangi; aser anepdang aonung shia mazüangi kipoksema; nubu yima jajar-a nisung karbo lir. Aji oda, iba ama tasa tamajung asar; sentong tamajung atonger; nisung sulenji teindang shisatsü adener-ibo manitaksüla. Ano kanga-sa tia maka nisung karbo; yimden, arogo aser lokti lemsar aliba mapang nungang, parnokbo lennir aser tokolak shilem agi atatsü maongka bushia; asa-lentong tapu-tapu atonga aser supokrem agi nubur mesüzüka; yimden, arogo aser lokti raksatsü sentong atonger karbo alitsü akok. Iba ama nisung tsüngdangji, pei dak alaka tangarbo shinga tetemsu malitsü...Parnok jagi nisung shinga agia tenuk masüngtsü; shinga daka tajung majitetsü aser shinga daka temulung malemtsü. Iba ama nisung jagi, yimden, arogo aser lokti ka longjema alibaji kodaser lemsatsü iba sentongji dang atongtsü. Aji oda, nisung karbo kanga-sa tia maka....Tamajung agi dang azükba karbo lir. Oda mapa tamajung aika inyak-aka; azükaroa tajungba-tajungba dang aliba nisung karbo lir....!!! Saka ibala nisungji kanga tepelatsübo masü....Ashiko, pa/la atema Tsüngrem'er mapang ka madonger tang asütsü akok. Anungji koba yimden, koba arogo aser koba lokti nung, ibala ama nisungji densema lidir, mesura iba amala nisungji lennir shilem agi ata-a lidir....Iba yimden, iba arogo aser iba telokjibo kanga-sa tia maka asütsü....Kechiyong iba amala nisung densema aliba yimden, arogo aser lokti nungji nuburtem kodanga yimjung nung longjema, sunepa malitsü. Koba linuk, koba yimtsüng, koba lokti nung tenukmerem, tsükchitep, tarishitep lidir....Iba linuk, iba yimtsüng, iba lokti nungji aluyimertema tsüksung-ensung masütsü, teka mapa nunga azükaro malitsü aser renloka tejakleni maotsü. Koba linuk, koba yimtsüng aser koba lokti nung tenukmeremtep aser tsükchitep lidir; iba linuk, iba yimtsüng aser iba lokti nungjagi alimai metettsüsa nungtuko lennir, watsü-wabong aser walunir tajung madoktsü. Aji oda, kati ka dak tajung aliba ajiteta, kati ka akümtsüba, kati ka den meimtepa aser putepa lira...Iba linuk, iba yimtsüng, iba loktiji temenungratsü-ka asütsü....Saka kati ka tai apotsü; kati ka dak tarak kettsütsü, kati ka jenjang raksatsütsü aser kati ka atsüngdoktsü merangra....Iba linuk, iba yimtsüng, iba lokti nungji teti mepetmesu, mangatettep aser telemsa alitsü.

Asen mimchir dak aketba sempet tajungtibaji...Tajung nung ranglokba aser tajung dang ajitetba (Positive attitude); iba sempet ya ajak dang tajungtiba asütsü. Nisung shinga noklang nung noklang tetemsu (100 % Perfect); iba nisungjibo mangutsü. Atangji, nisung shia dak tashimait mokokmein karbosa alitsü. Anungji lennir kar dak tashimait kar lira; sempet tajung jagi iba tashimaibaji nembangtsütsüla. Naring (Orange) sungdong aser Golap naro (Rose) sungdong ya ai (Torn) agi sunga lir. Ajisuaka, iba sungdong nungji Naring sungjang tajung atanger aser Golap Naro tobur tajung aponger. Asenoki ai (Torn) nungji dang ranglokra ai sungdong asütsü....Saka Naring sungjang tajung aser Golap Naro tobur tajung nungji ranglokra...Sungjang-dong aser Naro-dong asütsü. Asenoki tamajung nungji masü tajung nungji ranglokdi. Asenoki mapa tajung nungpo kati ka nem tenungsang agütsüdi. Asenok Manga-i teshinem menemba tesem dang meimbaamai....Tamajung dang meimba nisung ka mesuli. Asenok yimden, arogo aser loktiliba yanglushir aser tashi-itdaksür ka-ka asütsü ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Myanmar nung Khristan million 4 reshikangshi tia nung lir



Taküm March 28 nü Myanmar nung menoknok lendong tulu atalokba sülen tangokba noksa kar angur.

June 28, 2026: Tang Myanmar nung Khristan million pezü reshikangshi tia nung lir; nisung million 22-i teyari balala nungdaker, nisung million 12 chiyungtsü agi anünger aser nisung million 3.7 shi tesem balala nung jenshia lir, ta osang ka ajanga metetdaksü.

2021 küm Myanmar nung Aung San Suu Kyi-i aniba democratic sorkar atsüngdokba sülen sepaitem yimsüsüba kübok Myanmar nung Chin state kübok Khristan jila Thantlang nungbo Tenla ki 22 nungi Tenla ki 21 bo raksatsüogo.

Iba jila nung ki aika rongdoktsüogo aser jila nung alirtem teimbaka jenshiogo. Sepaitemi mi senoktsüba sülen mi enseptsü atema Pastor, Cung Biak Hum-i nisungtem ayongdenba mapang nung pa khasetba sülen temangji anüka alangsatsü.

Aiben Myanmar nung Rohingya Muslim nungertem reshikangshiba osangbo angashir, ajisüaka iba linük nung Khristantem reshikangshiba osangbo temai madoker.

Tang Myanmar nung Khristan million pezü ser tesadang shibo reshikangshi tia nung lir.

Myanmar nung sepaitemi dang masü saka Buddhist telok Arakan Army (AA) aser Islamic telok Arakan Rohingya Salvation Army (ARSA)-ia Khristantem anema inyaker.

2025 küm kija nung sepaitemi anünglen nungi amakdang tanur 232 densema nisung 982 tepsetogo aser parnok teimbaka Khrisantem lir.

Taküm March ita nung menonok lendong nung nisung 4,000 dak tali asüba sülen-a sepaitemi maneni bomb amshia civilian amaker.

Myanmar nung nütsüng shilem 6 dang Khristantem lir, aser parnok teimbaka arrtsülen aliba lisopurtem lir.

Myanmar kübok Chin state nungbo nütsüng shilem 85 shi Khristantem lir. Iba state nung Tenla ki 70 dak tali bomb amshia raksatsüogo. Kachin

state nunga nütsüng shilem 34 shi Khristantem lir aser Kayah state nunga nütsüng shilem 46 Khristantem lir.

Sepaitemi Khristantem nem kangshia mapa tasak inyadaksür, kuli kecha makai pua ayur aser ken o mangadangi tepseter.

Buddhist nütsüng tiemba aliba linük nung sepaitem dang Khristan tetsürtem den kibong akümtsü ajungshir aser Khristantemji Buddhist yimsü dangi meyipdaksütsü ajungshir.

Myanmar-i Khristan yimsü aruba sülen küm 150 jungogo, ajisüaka tang tashi Buddhist nationalist temi Khristan yimsü ya bendanger yimsü ama züngshir.

Iba linük nung Tenla ki asütsü, tenem kolak nung Kangki ayutsü aser pei yimsü register asütsü atema tenokdangba aika lir.

2021 küm sepaitemi democratic sorkar

atsüngdokba sülen sepaitemi Arogotem ya amokmeren tuluka ama züngshia Arogotem, clinics, Khristan schools aser Khristan aid centers anema inyaker.

USCIRF report ajanga ashiba agi, 2025 küm kija nung Myanmar nung sepaitemi tekülem ki 379 raksatsüogo, Arogo nung lenirtem aser Tenla kitem nung jenoka alir 259 tepsetogo.

Taküm January ita nunga sepaitemi Zup-ra Kachin Baptist Church amakdang nisung trok asü, March ita nung Banmaw nung aliba St Patrick Tenla ki rongdoktsü aser April ita nung Chin state nung Tenla ki asem amakdang pastor ka asü.

Burma Research Institute-i ashiba agi, 2021 küm nungi tenzüka pastor 11 tepsetogo aser 21 puogo; tesülen Rev. Thian Lian Sang aser Rev. Hkalam Samson nabo chiokogo.

state sorkari tekong meranga iba tetuyubaji benok yonga Hindu nunger sarasadem aser külem küjaba nungji Khristan tanurtem aser tesayurtem bo mezüngoktsüla, ta ashi.

June 24 nü osangbenertem den jembidang Paul-i, "Iba tetuyuba ya nütsüng ajema alir tamangertem temeden anema lir, kechiyong pei yimsü sadoka beshitsü atema nütsüng ajema alirtem nem temeden agüja lir," ta metetdaksü.

Christian Welfare Society-i shidi ka ajanga education department dang iba tetuyuba kübok Khristantembo maidaksütsü atema mepishiogo, ajisüaka tang tashi nungbo parnoki telangzüba magütsü, ta paisa metetdaksü.

"Tanga yimsü indang sarasadem agitsüji onok atema kanga tasak; ibaji sorkari angatettsü ta onoki imlar," ta Paul-isa metetdaksü.

Progressive Christian Alliance nung coordinator aser Pastor Simon Digbal

ANOGO ABEN TSÜNGREM DEN

Nazareth Nungi Naphtali

"Kechiaser sensaker dang osangtajung sayutsüngitsü pai ni mezüja shimtet"
(Luk 4: 18a)

Khristan teimba alidak sayatenya bulua mataloker. Külen taneptsüba aser sayatenya ajak nung lir; mamangertem asoshi mimji kechi ?

Isaiai Tsüngrem tebang nungi langzü: "Aser Isaiai kanga tasü itta ashir, Shirnoki ni mebushi parnoki ni angu... Tashi mangaba aser tekong temerang pur dang anogo tepiyong ni teka salaogo" (Rom 10:20-21). Kodang nüburtem nüngdak jagi Tsüngrem atonger pai mapa inyaker. Shiranger alidak doctortem alitsüla. Dawidi sempettem indang shina ashi: "Nai nisung rongnungi sempet agizük. Au, Kibuba Tsüngremi parnok den alitsüsa, tashi mangartem nungia agizük" (T. Ken 68:18).

Khristai tekong meranga mamangba pur rongnung sayatenya lepshia inyaksü mejangrar. Pai Cana, Korazin aser Capernaum nunger temulung memeyip mulungsentsü ngua arütsü" (Yn. 4:46-48; Mt. 11:20-24).

Khrista memetetba pur dangi aotsü sempet agütsü. Tsükchirtem den meraratsü nok-o-nü kechi nüngdak. Tsüngremi nisung tejangraba tenla sabangi bener arua tenladaktsüner. Yisui Nazareth toktsü, aser Zebulum aser Naphtali ammag lima nung mapa inyak (Mt. 4: 13-16). Ibai missionary tayongzükba ka lir.

Kibuba Yisu, Nai inyakba mapa inyaksü onok rongnung aika adokdakjang ta asenoki Pa dang shidi.

Tandi-i, "Iba tetuyuba ya India onoki iba tetuyuba ngudir nunger secular tangatetba onoki iba sülenji ang anema lir. School tem ya telemtetba agitsü," ta secular rejutem asütsüla aser metetdaksü.

yimsü ka majungkettsütsüla," ta ashi. Ano külen akhi tribal yimsü amangertemia sorkar tetuyubaji anema ola adokogo.

Osangbenertem den Tribal lenir aser taoba jembidang Tand-i, state sorkari iba tetuyuba ya mapang MLA, Manish magienra onoki iba tetuyuba Kunjam-i, "Adivasis [tribal anema High Court nung ken nisungtem] ya Hindu o agütsütsü, ta metetdaksü.

"Nüngdak dang süra iba nungertem masü, anungji tetuyuba anema ken o school tem nung Hindu yimsü beshitsü atema onok benoktsü atema onoki ozüng matsüngdang kangshia benoktsü menüngdak," ta ashi.

tsütsü mongintem den Paise, iba ya Rashtriya jembitsü. Sorkari kangshia Swayamsevak Sangh (RSS) onok matsüngdang iba asalentong lir, ta tetuyuba benokra onoki ozü state sorkar dang tangsa iba yimsü temeden kümzüksü tetuyuba ya agientsüla, ta atema inyaksü," ta Tand-i takhangba agütsü.

metetdaksü.

Khristan school ka nung Tribal students' tentet, principal kati, tang tashi Adivasi Yuva Chatra nungbo sorkari par school Sangathan-ia June 19 nü shidi nembo iba tetuyuba agüja ka ajanga state Angh dang mali, ta metetdaksü.

education department indang tetuyuba ya agientsüla, kechiyong iba ya ozü sobaliba aser yimsü masü, ta metetdaksüogo.

Khristantemi school nung Hindu nunger sarasadem agitsü memelunger

June 28, 2026: Chhattisgarh nung Khristantem aser tribal nisungtemi school tem nung Hindu nunger sarasadem nung shilem magitsü, ta metetdakja state sorkar dang school tem nung Hindu nunger sarasadem agitsü tetuyuba agüja aliba ya agienang, ta mepishi.

Khristantemi shidi ka ajanga state Angh, Ramen Dek dang school tem nung iba tetuyuba ya agientsüla, ta mepishia metetdaksü.

June 12, 2026 nü state education department-i state nung aliba sorkari registered school ajak dang anogo shia Hindu nunger tsüngremtem tushia sarasadem agitsü, temeshi milen tsükloktsü aser Hindu nunger sarasadem ka agitsü tetuyuba agüja liasü.

Iba tetuyuba ya tang tagidak academic session nungi beshitsüla, ta state education department-i metetdaksüogo.

Christian Welfare Society nung Tir, Christopher Paul-i,

state sorkari tekong meranga iba tetuyubaji benok yonga Hindu nunger sarasadem aser külem küjaba nungji Khristan tanurtem aser tesayurtem bo mezüngoktsüla, ta ashi.

June 24 nü osangbenertem den jembidang Paul-i, "Iba tetuyuba ya nütsüng ajema alir tamangertem temeden anema lir, kechiyong pei yimsü sadoka beshitsü atema nütsüng ajema alirtem nem temeden agüja lir," ta metetdaksü.

Christian Welfare Society-i shidi ka ajanga education department dang iba tetuyuba kübok Khristantembo maidaksütsü atema mepishiogo, ajisüaka tang tashi nungbo parnoki telangzüba magütsü, ta paisa metetdaksü.

"Tanga yimsü indang sarasadem agitsüji onok atema kanga tasak; ibaji sorkari angatettsü ta onoki imlar," ta Paul-isa metetdaksü.

Progressive Christian Alliance nung coordinator aser Pastor Simon Digbal

Tandi-i, "Iba tetuyuba ya India onoki iba tetuyuba ngudir nunger secular tangatetba onoki iba sülenji ang anema lir. School tem ya telemtetba agitsü," ta secular rejutem asütsüla aser metetdaksü.

yimsü ka majungkettsütsüla," ta ashi. Ano külen akhi tribal yimsü amangertemia sorkar tetuyubaji anema ola adokogo.

Osangbenertem den Tribal lenir aser taoba jembidang Tand-i, state sorkari iba tetuyuba ya mapang MLA, Manish magienra onoki iba tetuyuba Kunjam-i, "Adivasis [tribal anema High Court nung ken nisungtem] ya Hindu o agütsütsü, ta metetdaksü.

"Nüngdak dang süra iba nungertem masü, anungji tetuyuba anema ken o school tem nung Hindu yimsü beshitsü atema onok benoktsü atema onoki ozüng matsüngdang kangshia benoktsü menüngdak," ta ashi.

tsütsü mongintem den Paise, iba ya Rashtriya jembitsü. Sorkari kangshia Swayamsevak Sangh (RSS) onok matsüngdang iba asalentong lir, ta tetuyuba benokra onoki ozü state sorkar dang tangsa iba yimsü temeden kümzüksü tetuyuba ya agientsüla, ta atema inyaksü," ta Tand-i takhangba agütsü.

metetdaksü.

Khristan school ka nung Tribal students' tentet, principal kati, tang tashi Adivasi Yuva Chatra nungbo sorkari par school Sangathan-ia June 19 nü shidi nembo iba tetuyuba agüja ka ajanga state Angh dang mali, ta metetdaksü.

education department indang tetuyuba ya agientsüla, kechiyong iba ya ozü sobaliba aser yimsü masü, ta metetdaksüogo.

AO OSHI ANGAZÜKDAK:**TANÜ ANGAZÜKTSÜBA OJANG****Yimyayimpong**

(n) taküm ka libaliru, jaklayimya, awashi (behaviour)

* Tsüraburtemi tanurtem dang yimyayimpong tajung benschitsü sayutsüla.

Yimyim

(n) yimkong atema ayimoktsüba ola (public announcement)

* Yimtak yimsüsüri yimyim ayimoktsü.



Tir Yimyim

OLONG PAITEP # 7549

1				2				3		4
5		6								
							7			
8										
										9
		10					11			
				12				13		
14										
						15				
16										

TIPIEN

2. Auonungchiyongsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7548 TELANGZÜBA**TIPIEN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

The Kalgidhar Trust ajanga Punjab, Haryana, Himachal Pradesh, Uttar Pradesh aser Rajasthan nung lapoka aliba Akal Academy school 121 nungi kaketshir 15,000 temai anti-drug awareness campaign tulu ka nung shilem agiogo aser parnoki World Book of Records, London nung züngsemsü atema "WE ARE DRUG FREE" olungtem yanglua liasü. Iba otsü ya parnoki International Day Against Drug Abuse and Illicit Trafficking nung yanglutsü meranga liasü.

Arunachal CM Khandu-i 'Operation Arunoday' tenzüksü**Itanagar, June 28, 2026**

(Agencies): Arunachal Pradesh Chief Minister Pema Khandu-i Honibarnü 'Operation Arunoday' tenzüksüogo.

Iba ya Arunachal Pradesh nung civil-military initiative ka lir aser adventure tourism

ajungketba den state nung arrtsülen sayutsü nükjidong nung agir.

Arunachal Pradesh arrtsülen indang kümüzka ayuba dang masü saka nübortem nem item tesem reprangdaksütsü aser ajangshidaksütsü atema lir ta

CM Pema Khandu-i ashi.

Iba sentong kübok Thingbu village nungi Bajrang Peak tashi trekking route lapoktsütsü.

Iba mapatong ajanga Arunachal Pradesh nung adventure tourism lenmang sadema aliba sayutsü lisopurtem nem maongka balala bentsür arutsü.

Iba sentong ajanga Arunachal Pradesh arrtsülen tali meteta akümtsü aser alima tobur ajung sayuba den kanga dang tongtipang ta asüba jangjatsü ta CM Khandu-isa ashi.

Iba expedition ya Indian Army aser National Institute of Mountaineering and Adventure Sports (NIMAS) külemi agir.

PM Modi-i Tripura Global Pineapple Festival tenüng asanger**Agartala, June 28, 2026**

(Agencies): Tripura Global Pineapple Festival 2026 ajanga alimai 'Queen Pineapple' tali tejangjaba meteta akümtsü ta Prime Minister Narendra Modi-isa ashi.

Iba benjung ajanga trade, investment aser farmer welfare asoshi maongka tasentem bentsür arutsü ta pai ashi.

New Delhi nung Tripura Global Pineapple Festival 2026 lapoktsüdang Prime Minister Modi-i Tripura sorkar, Ministry

of Development of North Eastern Region (DoNER) aser sendaktepa alir ajak nem tenüngsang agütsü.

Tripura nung süngjanglijang tajung aika atanger aser 'Queen Pineapple' ajanga tenüng tajung nguteta lir ta Modi-isa ashi.

Tripura indang 'Queen Pineapple' nem Geographical Indication (GI) tag agütsüba ya Tripura nung aluyimba senmang agizükba lir ta paisa metetdaksü.

Iba benjungmung ajanga farmers, entrepreneurs,

exporters, researchers, industry leaders aser policymakers sabang ka nung adenshidaksür aser item tesentaktep ajanga agricultural value chains akangshitsü aser market access tajungba akümtsü ta PM Modi-isa ashi.

Centre sorkari Northeast renloktsü atema asalentong lir aser sorkari tesüba küm 12 tashi "Act East, Act Fast and Act First" mangdang yua inyaka aruogo ta Prime Minister Modi-isa metetdaksü.

गृह मंत्रालय
भारत
सरकार**CENSUS 2027
NAGALAND****SELF - ENUMERATION**ENDS ON
30 JUNE 2026ENLIST YOUR
**HOUSEHOLD
TODAY**

Saves your time



Protects your privacy



Helps Enumerators



It takes only

2-3

minutes.



Scan for more details

Visit Today: se.census.gov.in

CensusIndia2027

Venezuela menoknok lendong nung asür 1,400 jungogo



Caracas, Aami/June 27 (Agencies): Venezuela nung Honibarnü tashi nung menoknok ana anokba lendong nung asür 1,400 jungogo. Kasa mapang nung bendanger teküzmükertem linüki aika arudar aser taküm alirtem bushitsü atema maneni meranga inyakdar.

La Guaira aser Caracas temeket nung teküzmükertemi tesem balala nungi tasü mangtem agitetba sülen asürtem indang osang agütsüogo.

Ketdangsürtemi ashiba agi, bendanger teküzmükür 1,600 dak tema linük tonga aruogo aser team talilattem lendang lir.

La Guaira kübok menoknok agi kanga mejungi kongshir aliba Caraballeda tesem nung U.S. helicopter temi teküzmükertem anir senzüba nguogo, ta Reuters-i metetdaksü.

Volunteer tem rongnung arishi küm 33 tain industrial engineer Alejandro Serrano densema liasü, shiba Venezuela anütoklen San Cristobal nungi pa tenü arishi küm 24 tain Ana Serrano bushia aru. Serrano ya Caraballeda nung Bahía Mar building nung lia liasü, koba menoknok agi raksatsüogo.

Serrano-i ashiba agi, pai Brehostibar aonung Caracas' Perez Carreno Hospital nung la bushi saka mangu. Paisa, pai Argentina aser El Salvador nungi teküzmükertem nem pa tenu indang osang tejangja agütsüogo.

"Parnoki ki ajaras aliba nung la mangutsü imlar," ta pai ashi. "Ajisüaka ni la angutsü nüngdaker."

Honibarnü Caraballeda aser Los Corales kübok tesem kar nung heavy machinery tem amshia mapa inyakogo, saka

lendong agi kongshir aliba tesem nung alirtemi ashirtemi ashiba agi, teküzmükba maparen ya tesem ajak nung kasa benoka minyaker.

Ketdangsürtemi La Guaira-i aiba lenmang nung maneni tenokdangba agütsür lir, aser ashiba agi, gari tali senzüba ajanga emergency garitem senzusenpong nung tetsükdaksü adokdaksür. Official rescue team tem den sendaka maliba nüburttem checkpoint tem ajangtsü atema kuli kaket tejangja nüngdaker.

Sorkari nisung meyirejang aika samar bushidar ta shiogo aser kasa mapang nung linük opposition-i nongitba website-i ashiba agi nisung 55,000 dak tema tang tashi monguteti lir.

U.S. Geological Survey-i, menoknok lendong nung asür 10,000 dak tema asütsü ta asatetogo.

Karachi nung Pakistani rangers asem tepsetogo

Karachi, Aami/June 27 (Agencies): Karachi nung Sindh Rangers facility ka amakba sülen paramilitary troops asem tepset aser pezü yirutsüogo, ta Pakistan military-i sangdong ka ajanga metetdaksü.

Jamaat-ul-Ahrar nungi züngsemtemi Karachi kübok Gulistan-i-Jauhar tesem nung Rangers camp ka kikümtong nung bomb ka pokdaksü aser iba sülen sepaitem dak injang khalokja liasü, ta kasa sangdong ajanga metetdaksü.

Tenük kuli agütsürtemi ashiba agi, Pakistan indang meteorological department aser university aika amenoka aliba tongtambang lenmang ka anasa parnoki bomb tulu ka apokba aser iba sülen injang khaloktsüba ola angashiogo

Mohammad Bakhsh-i ashiba agi, pa iba tesem anasa mosque ka nung saradema aliba mapang bomb apokba ola angashia liasü. "Menoknok anokdang ali anokshiba ama anokshia liasü," ta iba tesem nung restaurant ka kiburi ashi.

Military-isa, khatepba mapang telungpur asem tepsetogo aser Afghanistan nunger ka puogo, ta ashi.

"Pakistan-i iba tesem amakertem anema jenjang agitsü," ta kasa sangdong ajanga metetdaksü.

Iba tesem amakba ajanga Pakistan aser Afghanistan na rara tenzükshidaksütsü akok



aser Islamabad-i ano kidanger linük ya anüng ajanga amaktsü akok, ta tsübua bilemer. Linük ana tsüngda tawa mapang shia mangatettep adoka arudar aser February ita rara tamajungba rara liasü, kong nisung noklang aika tepsetogo.

Telungpur tem jenokdaksüba atema Islamabad-i Kabul daka tai tonglokja arudar, ajisüaka Afghan Taliban-i iba taitzüba ya magizüker aser telungpur tebilemtsü ya Pakistan indang telung tebilemtsü ka lir ta shia arudar.

2024 küm October ita Chinese convoy ka maka China nunger ana tepsetba sülen Karachi nung tang iba lendong ya atalokogo.

Kütem tsüngda Pakistan nung tongtambang yimtitem amakba tajemba kümdar, saka kiralongrartem inyakyim timba küma odor aser azütokshi lendong ya yimtitemi prokshia aotsü ta tsübua bilemer.

Iran-i Middle East nung US sepai alidak amak

Dubai, Aami/June 28 (Agencies): Rara tembangtsü atema interim agreement zülutepa aliba ama meinyakra Iran lenirtem samatsütsü ta US Tir Donald Trump-i amokmerener mapang tatsüka sülen Iran-i Deobarnep Kuwait aser Bahrain nung US mitkar aliba tesemtem nung missiles aser drones khaloktsü.

Honibarnü Lebanon nung Iran-i bhukumba Hezbollah telungpur alidak amak ta Israel-ia Deobarnü ashi, koba Lebanon den raraba anentsü asoshi tang tesüsaba ceasefire tezüngzüktep agir anogo ka dang lir ataloker, koba tezüngzüktep tuluba nung aliba ama inyakti süra yangji raraba anentsüla, ta Iran-i ashir.

Strait of Hormuz nung tanker ka dak amakba sülen ghonda ishika lir US mitkari Iran nung ano amak ta shia liasü. Iba strait ya alima nung energy abenba lenmang tongtipangtiba lir, koba Tehran-i rara mechi shibanga liasü.

"Tebilemdangtsü makaba mapang ka arutsü akok, aser idangji asenoki mitkar tsütsü takok ngua tenzükba mapa tembangdaksütsüsa akumtsü," ta Trump-i social media nung ashi.

"Ibaji atalokra, Islamic Republic of Iran ya malitsü!" ta pai ashi.

Point 14 aliba interim peace accord ya ajanga rara anentsü liasü, koba US aser Israel natu February 28 nü tenzük, aser strait tanaben lapoka ano Iran indang nuclear sentong amala jembishinüa aotsü shia lir.

Hopta ka tejakdang Switzerland nung US Vice President JD Vance aser Iran parliamentary speaker Mohammad Baqer Qalibaf nati anir jembishinü aser Washington-i Tehran nem tenokdangba agüja aliba agien, saka asendenshir rarar.

Trump-i post sür ghonda ka shi sülen Kuwait indang army temi par air defences ajanga missile aser drome agi amakba nung langzür ta ashi, aser Bahrain-ia yanghi sirens ola yokogo ta ashi.

Iran indang Islamic Revolutionary Guard Corps ajanga sangdong ka nung par indang navy aser air forces temi Kuwait aser Bahrain nung US military sites nung tenük yoker missile aser drone operations tenzükogo ta ashi.

US-i amakba ajanga ceasefire ozüng raksa aser iba yongji onoki yimjung inyakyim

ajunga anentsü, ta Guards ajanga sorkar meyong Press TV dang ashi. IRGC navy command ajanga region nung America nunger alidak molumi ama ajangshitsü ta shia liasü.

US ketdangsür kati US facilities nung amakba Reuters dang ashi saka Middle East nung US senso asü-amaba mesüra US nunger aliba tesemtem nung teraksa tulu adokba mali ta ashi.

Ghonda ishika lir Bahrain nung siren ola tanaben angashi, kong Iran nungeri amakba mapang Muharraq province nung nisung aliba ki ka raksatsü saka nisung asüba osangbo mali, ta ketdangsür temi ashi.

Bahrain-i UN Security Council dang iba tatalokba asoshi Iran mernshitsü atema ajungben senden ka amentsü ayongzüka liasü. Kuwait army-ia ballistic missiles ana khazüka yok aser ki o jen raksaba mesüra asü-amaba mali ta ashi.

Item ya matalokdang US Central Command-i Honibarnü Iranian drone kati Panama nisang songa aliba tanker ka nung amakba sülen par sepaitemia amak ta shia liasü.

"Ceasefire tezüngzüktep akumtsübotsü Iran nem maongka agütsü saka parnoki

yamaji inyaktsü memulung," ta Central Command-i sangdong ka nung ashi.

US-i amakba ya shishilempaba rong anema Iran-i maneni tashiyim amshiba nung indang-indanga langzüba lir aser Iranian military surveillance, communications, air defence, drone storage aser mine aremba facilities nung tenük yoker amak, ta ashi.

Iran south tsütsü Sirik nung ola tulu adoka apokba angashiogo, ta Iranian state broadcaster IRIB ajanga ashi. "America nungeri tapi agi Sirik nung amakba ajanga onoki Strait of Hormuz amokbangtsü temulungtetba memelenshitsü. Saka onoki aibelener dak akhaba ajanga tanüngba rong tem dang lenmang müreksüba ashitsü," ta Guard ajanga ashi.

Brehostibarnü khu abenba rong ka nung amakba sülen Honibarnü tanker ka nung amak.

Iran indang Foreign Minister Abbas Araqchi-i, rara metenzükdang ama strait nung rong senzütsü ya Tehran dak keta lir ta ashi aser tangartem dang Iran-i iba strait ketdangsüba nung teka mamoshitsü ayongzüka liasü.

Washington-i Oman tzükumlen senzüdaksütsü

ajungshir aser Tehran-i rong tem par tzü aser par kübok aliba tesemtem ajanga senzüdaksünier.

Rong noklang aika iba strait majangteti lir, koba ajanga alima nung totzü aser LNG supplies shilem 20 bena liasü.

Deobarnem maneni makaka, CMA CGM indang Galapagos container ship ka strait ajanga adoka liasü. Lebanon nung Israel-i Deobarnü Nabatieh area nung amakdang Hezbollah telungpur rocket-propelled grenades bena alir tepset aser rocket launcher ka raksatsü.

Hezbollah nungi telangzüba kecha agüja mali.

Iran ya US-Iran tezüngzüktep nung maden aser Lebanon-i tang tesüsa Hokulbarnü densema US-i tetsüngtai ia ceasefire yangluba nung mulunga arur.

Ajisüaka item tezüngzüktep ajanga kongshiba kangabo mali, aser Israel-i Lebanon nung parnoki rakzüka aliba tesem nungi mainshitsü ta ashir, aser Hezbollah-i Israel sepaitem ali tashi nok-nü meyutsütsü ta ashir.

Hezbollah-i Iran bhukuma amakba sülen US tembar Israel-i March ita nungi Lebanon amak tenzük.

NJA-i ayongzüka 2buba Judo Ranking Event takok ngua agiogo



Mokokchung, Aami/June 28 (TYO): Nagaland Judo Association (NJA)-i ayongzüka Honibarnü 2buba Judo Ranking Event takok ngua agiogo.

Iba sentong ya Eden Academy nung agi, kong state kübok tesem balala nungi Judo asayar 156-i shilem agia liasü.

Asayartem technical skill aser parnok koda renloka aoer

aji asadangtsü aser standardized ranking assessment ajanga belt jenjang temabai ajungkettsü atema maongka agütsütsü nükjidong nung iba sentong ya ayongzüka agiogo.

Sentong nung belt category balala nung aliba judo asayartem jangrabangra shilem agiba nguogo, aser iba ajanga Nagaland nunga iba asaya

asayatsü jangrar timba küma aoba sayur.

Anogo tepeyong Nagaland Judo Association nungi qualified ketdangsür aser tesayurtemi technical evaluation balala agiba mapang sentong nung shilem agirtemi, parnok indang discipline, temulungtetba aser sportsmanship sayuogo.

Kasa mapang nung

Association-i, sentong kecha tetsükdaktsü makai takok ngua agütsü atema asayaba tesem agütsüba aser sentong nongita yariba atema Eden Academy dang kanga pelaba lemsatepogo. Maneni NJA-i, sentong takok asoshi coach, ketdangsür, volunteer, tsürapur aser supporter tem kwinakati nongita yariogo parnok danga

kanga pelaba lemsatepogo.

Sentong nung o jembiba mapang Nagaland Judo Association-i, grassroots jenjang nung judo asaya ajungkettsü aser lanur asayartem nem mapangshia parnok rank ajungkettsü atema maongka agütsütsü bendanga agütsür aliba nenshia metetdaksü.

Iba amala sentong ajanga sempet aketba asayartem jangjatsü, parnok ajungmesotsü aser tarutsü nung district, state, aser national tetoktepba balala atema judo asayartem renema toktsütsü atema tongtibang shilem agir.

2buba Judo Ranking Event takok ngua tembangba ya Association-i, Nagaland nung judo asaya terenlok asoshi merangdangba aser iba asaya asayadaksütsü atema lanurtem anir arutsü merangba nung alizüing tasen ka tongtetba lir, ta Nagaland Judo Association-isa metetdaksü.

Karate referee aser Judge-tem angazükshiba sentong agi

Dimapur, Aami/June 28 (TYO): All Nagaland Karate-Do Association (ANKA)-i Karate asayaba nung referee aser judge-tem nem inyakyim tasentem angazükshidaksüba sentong ka anogo ana agia June 27 aser 28 nü Logdrum Higher Secondary School, Sangtamtila, Dimapur nung ayongzüka agiogo.

Iba sentong nung Karate asayartem aser tesayurtem asoshi tanü asüing World Karate Federaton (WKF)-i latetba ozüing tasentem aser asayayim sayuba mapang agia liasü. Iba sentong nung WKF Judge aser ISKF Chief, Shihan Bankim Mutum Singh (7th Dan Black Belt) tongti tesayur liasü.

Iba sentong takok ngua

katettsüsa ISKF India aser ANKA president Shihan T.Sangtam den yaritepa ANKA Working president, Sensei T.Lanu Imchen aser Technical Director Thsathriba Sangtam nungertem nungitba asoshi pelar ta ANKA tongti zülur Tamsünungsang Sangtam-i sangdong ka ajanga metetdaksüogo.

US Open: Kidambi Srikanth final-i iogo



mezüingbuba game 21-15 agi akok, saka tanungba game ana ya 11-21, 15-21 agi mekoki tsükogo.

Tebur kija asaya nung ano Rounak Chouhan, shibai top seed Chou Tien Chen tsükdakja liasü, pai eighth seed Su Li Yang mekokteti tsükogo.

Yang aser Srikanth na tebur kija asaya final asayatsü.

Srikanth-i taküm küm asayaba asayamung ajak rongnung tang tajungtiba asayadar. Iba asayamung masaya tsüingda pa quarterfinals-a tonga masayateti liasü. Syed Modi International nung final tonga asayaba den pa 2025 küma Malaysia Masters nung tanabuba jenjang nung tembanga liasü.

Srikanth-i küm teku tashi tour nung asayamung ka danga mekoki asaya arudar. Pai tatamsa 2017 küm French Open koker lir. Iba asayamung final nung pai Kenta Nishimoto straight games nung koka liasü.

Taoba asaya nung Srikanth-i Chinese Taipei nung asayar Liao Jhuo-Fu 21-9, 12-21, 21-8 koka final nung India nung ana asayatsü akok ta bilema liasü, saka Rounak tsükogo.

Srikanth-i tang kanga junga asayaba ya Indian badminton squad asoshi teyari tulu asütsü, shirnok Asian Games asayatsü lir. Pa Asian Games nung tebur team nung züngoksema lir, shirnoki Hangzhou Asian Games nung silver medal nguogo.

FIFA WC: Congo, England, Croatia Argentina knockout round-i iogo

Aami/June 28, 2026 (Agencies): FIFA World Cup nung Deobarnü Democratic Republic of Congo aser Uzbekistan na asaya Congo-i goal 3-1 agi koka linük puti otsü nung tang mezüingbuba FIFA World Cup ka knockout round tongtetogo. Iba asaya nung Newcastle United forward Yoanne Wissa-i Congo atema goal ana idakja liasü.

FIFA World Cup nung mezüingbuba takok anguba sülen DR Congo ya Round of 32 nung England den asayatsü.

Asaya nung Uzbekistan captain Eldor Shomurodov-i par team atema goal ka idakja parnoki asaya kanga junga tenzüik saka iba sülen junga masayatet.

Asaya nung Wissa-i penalty spot nungi goal ka idakja goal kasasa aküm aser iba sülen Fiston Mayele-i Congo atema tanabuba goal idaktsü.

Maneni asaya atemtsü lia Wissa-i par linük atema goal tasembuba idakja parnoki asaya akok. Pai tang tashi nung goal asem idaktsür lir.

Group L nung Deobarnü New York New Jersey Stadium nung England-i goal 2 agi Panama koka parnok par telok nung temaba jenjang nung

tembangogo.

Asaya tanabuba shilem nung Jude Bellingham aser Harry Kane nati goal koka idaktsüba sülen England-i iba asaya kokogo.

Iba asaya nung England nung midfielder Jordan Henderson ya England nung asayartem rongnung World Cup pezü nung asayaba mezüingbuba asayar kümogo.

Kasa telok nung Croatia-ia goal 2-1 agi Ghana koka parnok tanabuba jenjang nung tembangogo. Ghana pur best loser tem rongnung densema round of 32-i aitsü maitsü mejangjai lir.

Croatia atema Petar Susic-i mezüingbuba goal idaktsü, saka Ghana atema Derrick Luckassen-i goal ka idakja kasasa aküm. Ajisüaka Nikola Vlasic-i Croatia atema tanabuba goal idakja parnoki asaya akok.

Kasa asayamung Group K asaya ka nung Colombia aser Portugal na goal koka danga magütsüteti asaya tembanga liasü, ajisüaka team anaprongla ya Round of 32 atema qualify süogo.

Asaya draw asüba sülen Colombia-i point tenet nguteta parnok temaba jenjang nung

tembang aser parnok taruba round nung Ghana den asayatsü. Kasa mapang nung Portugal team round of 32 nung Croatia den asayatsü.

Asaya nung team anaprongla goal idaktsütsü asoshi maongka nguteta asaya, saka goal koka danga magütsüteti asaya tembanga liasü.

Maneni Group J nung Argentina-i goal 3-1 agi Jordan madak takok ngua parnok asaya ka nung danga tamakok mongui Round of 32 tongtetogo.

Asaya tenzüker minute 19buba nung Lo Celso-i free kick tajung ka metsüokja Argentina atema mezüingbuba goal idaktsü.

Iba sülen box telung nung Julián Álvarez dak foul menaba ka VRA asadanga sülen penalty ka agütsü, koba Lautaro Martínez-i aibelen mesüi idakja parnok goal 2 agi tejakdang aküm.

Asaya nung Jordan atema-a Al Tamari-i minute 55buba nung goal ka idakja parnok nem timla agütsü. Ajisüaka Leo Messi-i free kick ka ajanga Argentina atema tasembuba goal idakja parnoki asaya akok.

Argentina pur round of 32 nung Cape Verde den asayatsü.

Aami/June 28, 2026

(Agencies): Deobarnü US Open badminton asayamung tebur kija asaya semifinal nung Kidambi Srikanth-i pa dang nungi temaba jenjang nung aliba asayar Yudai Okimoto koka final tongtetogo.

Semifinal asaya nung Srikanth-i Okimoto ya 22-20, 15-21, 21-19 agi koka liasü. Tena tsüingda ghonda ka ser minute 12 asaya. Srikanth ita tenet tsüingda tang mezüingbuba BWF World Tour final ka tongtetogo. Pa taoba küm November ita Syed Modi International nung tanabuba jenjang nung tembanga liasü.

Srikanth, shiba India nung lanur asayar tajung aika adokba ajanga rankings nung jenjang mejungi kümogo, pai iba asaya ya kanga süngjemshir asaya-a Okimoto madak takok ngutetogo.

Kasa anogo tetsür kija asaya nung Devika Sihag game asem kanga toktepba asayaba sülen second seed Line Christopher sen-i tsükdaktsüogo. India tsürla yagi

BILEMDANGANG

"Sempet liaka terangdangba melira takok mongutettsü."